

摛藻堂四庫全書薈要

集部

欽定四庫全書

舊要卷一萬五千二十二

集部

樂城集卷二十七

宋蘇轍撰

西掖告詞六十一首

林希集賢殿修撰知蘇州

勅具官林希朕歷選多士以備左右侍從之臣股肱之良蓋出於此爾以文學政事有聞於時擢從右史試以書命而行已不靖遽致人言朕不忍棄才尚寵以書殿往蒞吳俗思慎厥終可

楊傑知潤州

勅具官某京口江浙之會而揚楚方饑仰食鄰境朕思得良吏通其有無以濟民病爾以冬官屬績用有聞而欲自詭以治民朕不汝違其究乃心以底成效可

陳安期屯田郎中

勅具官某爾以能選積勞于工正升之文昌以勸勤吏矧司空之屬農部為上爾其益敬厥事以稱朕意可

蔡立知郢州

勅具官某武昌控引江漢勢居上流古為重地非練達政事不以畀之以爾久於治民為論者所稱朕將觀爾於是惟寬而勿弛明而勿苛則予汝嘉可

盛南仲知衡州

勅具官某朕進退天下士大夫不惟其才惟其行蓋未有不能正身而能正人者也爾以世族之後嘗為部使者矣而不閑於家厥聲達焉法不可置往即南服尚克循省可

許中正致仕覃恩改朝議大夫

勅具官某朕嗣服之初推恩海宇矧惟耆老之士蚤隆止足之風豈無寵嘉以慰鄉黨可

虞肇知鷗州

勅具官某武陵依重湖之深險據五溪之走集民夷雜居剽輕易擾惟守以安靖可以言治爾昔以才舉為御史屬官久於牧民宜在此選無煩條教以便遠人可

胡田知誠州邢浩知欽州

勅具官某等欽誠為郡雖有新舊之異而民夷襍處不可一以華法治也由自欽易誠其習南越之故矣浩自環慶往亦知所以治邊之宜惟寬可以懷遠人惟廉可以服殊俗輔以明斷其罔有不濟可依前件

王存磨勘改朝散郎

勅朝廷用人惟其才而考績必以歲月用人惟其才故政無不修考績必以歲月故官不失緒朕兼此二柄以御羣臣故雖六事之長猶寓郎官之秩具官王存文雅

足以飾吏事靖重足以鎮國俗恬於進退不為利回出  
入臺省人言無間司馬治兵朕既已重其選矣有司奏  
課并欲以報其勞焉可

梁惟簡供備庫使

勑朕惟崇慶日總萬幾號令所至澤遍海內况其左右  
侍御之臣朝夕執事之勞而有不被其賜者乎坤成之  
慶國有常憲尚勉忠孝思報其萬一可

張璪光祿大夫資政殿學士知鄭州

勅昔我神考收擢雋良寘于丞弼惟茲內史之重實綜  
萬幾之繁朕方將圖任舊人與之裁成庶務乃者總章  
大享百辟在廷時予重臣獨以病告不忍賢勞之久力  
求補外之安曲成其私勉遂所請具官某名臣之後風  
流具存儒術之英文史足用詳練政事究通物情樽俎  
可賴以折衝盤錯亟觀於遊刃輒自西臺之要付以新  
鄭之雄加秘殿之寵名兼進秩之異數使郡縣識朝廷  
之意而官吏知卿相之賢表帥四方朕尚有賴可

趙君錫太常少卿

勑太常總禮樂之政兼伯夷后夔之業平居無事若無所為至於郊廟社稷之儀朝廷上下之分一有大議罔不責成昔孫叔通為東宮傳以習於園廟復命此職趙宗儒失不任事由卿而罷為東宮師用人之難蓋自前世具官某篤於孝悌居家可紀敏以從政臨事不煩予欲決嫌而明微蓋有取於靜慎此官職清而事少亦將便於老成往服優恩勉揚厥職可

劉絢太學博士

勅春秋之廢於今二十年矣講者不以為師而學者不以為弟子孔氏之遺書而陵遲至是朕甚憫之爾能講誦其說遭棄而不廢蓋將有見於此夫三傳之義其得之者多矣附以啖趙無蔽於一家庶幾士有考焉可

鄧羲叔主客郎中

勅國有四方賓旅之事則主客掌其享燕餼牽之節其疏數豐殺皆有常度遠人於是觀禮不可以不慎爾既

掌其事矣以資當遷其益勉之以稱其職可

林旦侍御史權淮南運副

勅具官某淮甸之民薦罹饑饉乃者詔發倉廩輶吳楚之漕以拯其急猶以乏食流徙達於朕聽朕惟救荒之術行之略盡惟得良使者因事施宜為若可賴爾由郎官以才任御史習於揚楚之故其為朕往視之均徭薄歛禁暴戢奸無使斯人重被其困可

田侍問淮南運判可淮南提刑

勑具官某楊楚春旱春秋水民艱於食漸起為盜遂使州  
縣犴獄充滿朕憂之未始一日忘也間起爾於山陽守  
叅領漕事今又命爾督視刑辟徒以爾習其風俗知吏  
民所疾苦夫察貪暴謹追擾均有無督盜賊此荒政之  
急也勉勤其職以稱朕意可

陳紘可倉部郎中王古可工部郎中

勅具官某等漢郎官出宰百里今部使者入治諸司其  
為輕重異矣朕於是考察多士近而觀其不煩遠而觀

其不脩庶幾有得以待任使以汝等久於吳越優有善  
狀故使紓治予廩古治予工其益敬厥事以底成績可

孫升監察御史可殿中侍御史

勑具官某朕方共默不言責成於有司正賴耳目之官  
別白忠邪論辯得失言而中理則予汝嘉不幸而失予  
不汝咎爾為御史期年於此矣察其所為忠慤不回以  
次而遷庶盡其用爾其深識朕意知無不言言無不盡  
安意肆志無悼後害可

李常蔡延慶並轉朝議大夫

勑三考而議黜陟古今所同積日而叙勤勞貴賤無間  
矧夫內與六官之長外總連帥之權均大計之贏虛司  
隣邦之動靜歷年應格稽法當遷有司以言朕何敢後  
具官李常奮由踈遠深自刻修財賦所存綱目具舉具  
官蔡延慶名臣之後吏治有餘干城四方安靜不擾咸  
以侍從之選而膺股肱之良雖尺寸以遷未彰於異數  
而命秩之寵差慰於久勞可

徐彥孚澧州通判

勅具官某河徙而西則澧淵非復昔日之舊然國門之北兵屯倉廩猶甲於他郡大臣言爾可用往丞守事勉竭才力以安我股肱之名郡可

章淳知揚州

勅樞臣之長出居列郡汝海之地僻在連山邈焉鄉黨之遐疑失親庭之便朕方以孝治天下德綏臣鄰宜惟茂恩俾易近地具官某蚤以文詞中選拔出於衆人中

以功名自期被遇於先帝逮予纂服亦既期年比緣議論之差授以方州之寄澹然自守綽有安靜之風卧而治民不失綏懷之體眷揚楚之重地據吳越之通途足以分予南顧之憂俛足以慰爾思歸之願體朕至意勉於裕民可

邢恕知汝州

勅具官某觀過而知其仁君子與之爾有志於時而不知力之不逮以陷於過徐察其中蓋有足矜者臨汝古

郡民朴而事簡可以自養益務修省不汝終棄可

王令圖可都水使者

勅大河西流泛溢千里河朔之民以蒲翫為生與魚鼈同居朕中食而歎思得明習水事之人而與謀之具官某老於從政才力有餘出入兩河間知其得失久矣水官之職爾實宜之楊焉王延世之功朕有望焉可

王荀龍知澶州李孝純知棣州

勅具官某等治國如烹小鮮蒞官如製美錦以煩手烹

魚則魚必潰使學者製錦則錦必傷朕知斯民之艱難  
擇人而養之閔閔焉若將不及以爾荀龍典刑舊德習  
於為政以爾孝純家世循吏屢典大邦遭淵無棣皆河  
朔之要擇以付爾其益勉之朝夕無怠以深副吾望可  
依前件

郭達自致仕起知潞州

勅秦伯復用孟明是以能霸蜀人亟誅馬謖終亦無功  
朕周於用人篤於求舊雖設干羽以懷柔異類而聽讐

鼓則無忘將臣。豈其舊勲，久廢不用。具官某，蚤學弓劍，晚通詩書。勇而有謀，整且能暇。威名憚於西鄙，柄任及於中樞。南伐無成，嗟伏波之遂棄；退居能飯，知廉頗之未衰。擢從解組之餘，復寄長民之任。過而能改，豈一青之足？云窮當益堅，或來功之可冀。勉於圖報，以稱異思可。

何正臣知梓州

勅東蜀地，檢而民貧，不如西蜀之厚。而戎瀘被邊，民夷

襟居安之尤難朕方寬賦役以裕民正疆場以息衆連  
帥之任宜得其人具官某奮自東南擢居侍從參議論  
於臺省布條教於方州比自長沙復臨上黨出入既久  
當識朝廷之心寄任愈隆初無遐邇之異務為安靖以  
慰遠民可

孫覽河北運副除右司郎官

勅具官某奉使北方治河而備邊任亦重矣以為未足  
以盡其才也召而寘之都司吾之所以責任爾者可見

也夫分治六官事無巨細畢陳於前若網在綱振之則舉弛則盡廢爾昔既稱治辨矣勉既厥心以觀來效可

陶世延

弼孫弼死於順州

邢選

吉子吉死於盜

各補三班借職

勅陶世延等惟乃祖父以身殉職義不旋踵寵爾一命庶幾士知忠力之必報可依前件

皇兄令羽磨勘轉遙團

勅具官某考績之法一以歲月為勞而不以親疎為異爾能靖恭於位積日當遷以環衛之榮而加團結之寵

益勉忠孝無溢無驕以保祿爵之重可

張輔之入內內侍省磨勘轉內殿承制

勅具官某昔文武之盛其侍御罔匪正人今余近習之臣與搢紳之士均遇以法亦無以私恩進者爾以久勞當遷往祇厥官使天下知叙法之公無内外之異可

范鎮可侍讀太乙宮使

勅為國無強於得人用人莫先於求舊朕歷選賢雋至  
於側微患其德望之未充而典型之未練舍骐驥而不

御臨長道以咨嗟昔人病之予何疑者具官某文冠多士有揚雄之遺風仕歷三朝守劉向之忠節早事仁祖首開社稷之言晚說裕陵復陳堯舜之道自處於義歸不待年身友漁樵已無求於當世名書簡冊恍或疑其古人茲予纘服之初日思講議之益謂白首窮經之樂尚可推以予人而真祠訪道之遊足使退而養志勉徇予意毋留所安可

吳師仁可越州司法充杭州教授尹才號州司戶

田述古襄州司法蘇炳邠州司戶

勅進士某等古者舉逸民以懷天下朕以爾等皆以行義聞於鄉黨故命之一官試之行事其勉於從政以效聲聞之美可依前件

叔諱

先因殺人追官勒停已  
叙令叙右千牛衛將軍

勅具官某貴而犯法義不得宥過而知改恩不廢叙往服恩命而知義之可畏庶勉於咎可

黃履磨勘改朝請郎

勅漢孝宣帝勵精為政二千石有治理效輒增秩賜金  
朕追想其風欲見之於事而况積勞之久於法當遷者  
乎具官某頃自禁林出為方伯推其所學施於有政表  
賢獎善有古人之節考績應格吏以叙聞其益勉於裕  
民無使循吏之賞獨隆於前世可

宋彥圖轉內殿崇班再知歸信容城縣臧定國轉  
西頭供奉官再任縣尉

勅具官某等疆場之吏勇者或以致寇怯者易以納侮

朕方欲慎守四境以綏靖四夷求勇怯之中而有司以  
爾名聞各仍舊官以增新秩謹修邊政思稱朕意可依  
前件

張利一自真定總管移知代州

勅邊之宿將國之干城處則為民社之寄欲其不擾動  
則當金鼓之任責其知變兼是二者實難其人具官某  
世為將家久習疆事持重有守得將吏之心善覩多權  
知敵國之變雁門極邊密邇獯鬻朕方懷柔遠人以寧

中國爾其謹守吾圉示之以信而裁之以義適寬猛之中以稱予意可依前件

莊公岳成都提刑蘇泌利州運判

勅莊公岳等守令賢否朝廷不能自知天下利病吏民不能自言宣吾德澤於下而達民情於上者部使者也朕既選用舊人而去其貪暴詔舉新進而汰其不以實者矣以爾公岳久任刺舉所至稱治以爾泌家世文雅通於吏事益利儉遠民罹茶鹽苗役之害罷瘵未復朕

念之深矣其悲乃心謹察苛吏與民休息毋廢朕命可  
依前件

內臣馮景

見任文思副使知父以園業獻安仁保佑夫人曾得銀帛父亡詐認園地降一官

勅具官某以欺得罪律既重矣觀望高下情尤不可赦  
也奪爵一等益務循省以蓋其咎可

胡宗哲遂州張太寧漢州

勅具官胡宗哲等朕惟西南之遠弛鹽利之害議茶榷

之弊以寬其人矣惟是役法久而未定吏緣為奸人或告病夫因事制宜法不能盡順民施法責在守令宗哲家世公卿習於吏事太寧生長蜀漢知其風俗遂漢名郡皆東西蜀之重地苟能平心正身首治繇事以寬民力則太守之職舉矣可

李挺知唐州

勅具官某異時為郡清心潔已平政理訟斯為賢太守矣朕方變役法之弊新故紛然民意未定京西俗寢役

勞治之尤難以爾嘗試為郡條教不煩往宣朕意勤察  
貪吏使民忘繇事之勤此朕所望於二千石也可

崔全通判延州

勅具官某將帥治邊以軍政為重至於均賦役平獄訟  
實倉廩郡丞事也使者以爾才稱往貳高奴克勤庶事  
以分帥臣之勞可

王純臣通判岷州

勅具官某朝廷始復洮岷以其初附濶其憲令吏緣是

為奸政事不舉今其郡縣日益完矣居其官者當以近地為比爾以選往其謹守條約毋以遠故廢職可

姚兕磨勘轉東上閭門使

勅具官某爾以勇氣聞於西陲奮身稠人致位通顯夫論功而賞雖如丘山不以為重考績而遷差之毫釐有不能得國有常典朕弗敢私勉勤庶官以靖疆場可

丁騤太常博士

勅具官某朕方出滯淹以修庶政舉廉退以靖風俗以

爾學有本原聲聞東南一時交遊皆致位通顯而循默  
自守浮沉管庫將二十年不以為恥奉常禮樂之地教  
化所從出也因其職事而施爾舊學朕將觀焉可

常安民大理寺丞

勅具官某吏習於法而不更治民閑於論報而不知為  
政朕疑其未能盡法之變也爾以經術進而治縣有聞  
考課稱最往蒞丞事庶幾有補於法可

田子諒湖南運判

勅具官某天下之治緩急相矯常過其中乃者常為刻  
斁之政矣其弊也事徒文具而民受其病今予欲以寬  
治民憂其末流頽弛而莫振夫推予意而布之州縣部  
使者之事也公卿言爾才力有餘試之南方寬而不弛  
察而不苛則予爾嘉可

鄭佶都水監丞陳安民簿

勅具官某等朕既平政以便民民少安矣而大河以北  
水不潤下昏墊為虐故當今之政水事為急以爾佶嘗

丞水官練達有素以爾安民屢試民事治辦見稱其益  
講求本原以稱厥職可

葉康弼知劍州

勅具官某朕銓綜庶工獎勵失職思使中外樂事勸功  
相勉以治爾昔以選任使者中以事廢盤桓不試普安  
蜀漢之咽賓旅之會地襟礧衍民艱於食往修厥官以  
稱恩命可

謝卿材河北轉運使

勅三路之重一也關中夏秋豐穰羌人欵附而河朔大水人民流離北顧之憂於是為急具官某強敏而惠靖重而文風節之厚追配古人踐歷之久號稱循吏今河決西流而堤防未立民棲丘隴而播種未期爾能相壅決之宜通有無之積以寬民力而紓吾憂此朕所以用爾於北方之意也可

蔡卞磨勸朝奉郎

勅朕俾侍從之臣出守四方試之從政以觀其才而有

司考課積勞應格國有成法非予所私具官蔡卞奮由文藝久踐臺省欲效才實之美自詭民社之政宣城古郡晉唐名臣臨長其地者風績相望也爾其勉思古人以修條教服我新命以寵吏民可

丁恂少府主簿

勅具官某古者謂少府為天子私藏朕為天下夫復何私惟是技巧之工以供禮樂之用爾以吏能掌其典籍法度之事其講明之可依前件

張構再知豐州

勅具官某爾既嘗為九原矣知其風俗而習其吏民治之為易使他吏往雖得賢者要必久而後治也使者既以爾言勉悉乃心綏我疆事可

呂大防中書侍郎

勅用人先於求舊為政莫如守成朕若稽祖宗之遠猷祇敬神考之近事網羅遺放而獎任勲舊崇尚寬簡而慎守典刑茲予一時股肱之臣率皆三朝髦儕之選圖

任之意炳然可知具官某器宇博深才智強敏早遇英  
祖亟聞直諒之言中臺裕陵不改忠誠之節翺翔外服  
所臨有聲綜轄中臺百務咸舉甚和而理處劇不煩朕  
方欲力行忠厚而患其力行之惰渝追復賦役而惡夫  
下吏之侵擾思與在位同協厥中往貳西臺之隆益敦  
大政之本朕既開懷以用善士亦誠意以報予其克一  
心同底於道可

劉摯右丞

勅漢御史大夫能任其職則為亟相近世中執法議論  
不撓亦補執政昔我仁祖優養正士開受直言時則有  
若包拯張昇之流咸以敢言獲聞大政舊俗已遠此風  
寂寥容悅相承亦棄不用朕追懷先正選建忠賢謗讟  
之聲庶幾前列具官某早以御史祇事裕陵力陳是非  
不避權寵十年流落志氣不衰召置臺端首開正論進  
任中司之要屢聞白簡之言風聲凜然國是以定朕欲  
試其行事之實是用付以右轄之權治忽所關寄任尤

重夫以言責人甚易以義持已實難爾其勉之毋使輔政之功不若言事之效可

傅堯俞御史中丞

勅枉直未定決於繩墨之平是非相承臨以法度之士比朕纘服之始羣議紛然實賴耳目之司力陳骨鯁之論逮茲閱歲沒以成風然而神明存乎其人衆正可以無咎余欲一變至道固須多士以寧具官某凜然直諒之風出於愷悌之性早為御史議禮不阿中列諫垣言

政多恬流落雖久志氣益堅俾還侍於燕間日有聞於  
禮義執法之任非爾而誰蓋政無舊新以便民為本人  
無彼此以得賢為先朕將允執厥中爾尚不牽於俗可  
張端落致仕依前朝奉郎

勅具官某君子之仕進退無常惟義所在爾昔以強敏  
之資達於從政由病賜告未老而歸比於恬養之餘復  
有願仕之意朕方篤於求舊急於用人祇服前官以聽  
新命可

孟永和轉軍器庫副使兼翰林醫官副使

勅具官某以醫為職生死係焉不幸而失豈專其罪比  
更大需其益進厥官俾精術業以答恩命可依前件

蔡卞知江寧府

勅左右近臣入備侍從出典藩服習知朝廷號令之意  
灼見吏民情偽之本此朕所以歷試在位而成就人才  
之道也具官某文華之美發自早年才力之優見於治  
郡宣城之政數月而成秣陵之徒百里而近既助予治

亦安爾私勉修厥官以答恩寵可

王安禮知揚州

勅淮南天下之重鎮也俗本剽輕習吳楚之舊歲仍水旱有流亡之憂朕深念其民尤慎所付思得朝廷之舊以殿東南之衝具官某吏治有餘儒雅足用昔為京兆休有治功其發摘奸伏明而不苛其推行惠術寬而中理遂領臺轄以東國成方先帝勵精求治之秋有大臣進賢退奸之助久於外服稍易近邦其克為朕舉荒政

以惠民謹追胥以助治寬我南顧康此凶年可

林希知宣州

勅具官某爾名在文學之科而才兼政事之選比以吳  
郡生齒蕃衍學者如林假爾才名以重其守而喬籍所  
在重以親嫌飛章自陳懇求易地宣城大藩亦東南之  
要往蒞其治服我異恩可

王舜圭

確山縣尉獲賊二十  
一人除左班殿直

勅具官某盜發鄰境而能率衆攻討殲其徒黨非特武

力之勝抑亦智慮有過人者矣寵以勇爵以為能吏之  
勸可

欒城集卷二十七

謹案卷二十六第一頁後五行并棄羹誠按茅坤

選本并作斤

第二頁前六行書來告衰刊本衰訛哀據文忠集


改

第十二頁前二行公訛莫聞刊本聞訛開據茅坤

選本改

欽定四庫全書





總校官庶吉士臣張能照  
校對官中書臣張 墳

謄錄貢生臣黃永澄

欽定四庫全書叢書要

集部

樂城集卷二十九

詳校官助教臣常循



欽定四庫全書  
薈要卷一萬五千二十三

集部

樂城集卷二十八

宋蘇轍撰

西掖告詞六十一首

鄭宣通判永寧軍

勅具官某北邊俗淳而士武隣好輯睦日以無事爾昔嘗以才任刺舉矣久而不試往貳博野尚勉無怠可叔攷等三十二人並除右班殿直

勅具官某男某等士勤身苦節從事於文武積累歲月

僅乃祿仕以免於耕勞亦至矣今宗室之子始名而官其克孝悌於家忠信於國識吾尊祖敬宗之意以終保祿位可

王宗孟母

王宗孟南京推官母年九十三封壽昌縣太君

勑具官某母某氏年及髦期而家有壯子非有馴行不能致此福也寵之封邑不吝常典尚俾天下知貴老教孝之意可

胡宗愈吏部侍郎

勅吏部分列三銓而長貳各領其一其為權任重矣天下官吏至於其間長短有度輕重有數而猶患不得其當者吏撓之也朕敷求儕良付之流品意在是矣具官某學術之茂冠於東南操履之固不流世俗試於封駁任職不阿方今吏員冗溢待次者無算爾其去留難之否寬滯積之歎毋使吏操其柄而士失其職可

顧臨給事中

勅朕欲網羅天下之士而患知人之難惟有歷試之詳

重以旋觀之久雖復堯舜何以尚之具官某朴厚之性  
出於自然直諒之才可備三益守道安命端靖不回二  
十餘年晏然一節外督漕事公議惜之維是東臺封駁  
之司實予萬幾出納之地宜得守法之士以為過舉之  
虞爾其稽考典常附以經術令有不便知無不言使天  
下之人不能指摘而議則爾職舉矣可

范子竒司農卿

勅司農之政歸於地官則卿事寡矣然朕觀兩漢之士

政事如朱邑儒學如鄭衆皆老於此官則前代用人蓋不輕矣具官某家世名臣詳練吏事出入中外治辦有稱居九卿之列修后稷之政益勉無怠以答恩命可

馬默河東運使

勑具官某汾晉之民儉而能勤易以術富比緣兵役之後瘡痍未復思得靖重愛民之人為朕伺察害政之吏以爾博學不勤從政有方文登之民至今頌其遺愛彭城之治復能首發巨奸是用輒從大農寬我西顧朕於

用人無中外之間爾於報國無終始之殊務安邊民以  
稱朕意可

岑象求利州運判何琬江西運判

勑具官某等朕為官擇人不惟其才之雋良亦因其人  
之便習欲使上下相得所至即安以爾象求學有本原  
持心近厚昔在蜀部遠民宜之以爾琬才力敏明為政  
不擾頃居江左列城賴焉往修鄰道之政無替已成之  
效使西南之人雖在遐僻千里之外咸知朝廷愛之之

意可依前件

常安民瀉臚亟

勅具官某爾進由儒術舉以民政朕將觀爾於近以信其遠典客之職號為優暇益勉無怠蓋將有考焉可

李訖自軍頭司除知忻州

勅具官某武吏當守四方以干城吾民冗於內服糜以吏事雖有才力智勇無自而見爾世本將家習於武事求試於外朕不汝違夫治兵欲整而治民欲安能整且

安則疆場之事吾無慮矣可

郊亶通判睦州

勑具官某仕宦之優莫如鄉國知其吏民之態習其風俗之宜所至而安於治為易矧復桐廬之勝加以才力之優懷組而歸益勉無怠可

李琬太醫丞充中嶽廟令

勑具官某爾久習禁方善救諸苦勉思賦祿之厚益勵

好生之心可

王翬通判揚州

勑具官某爾故相之孫而名臣之子也生於富貴而篤志於學勇於議論而不謀其身淮南大邦民病水旱往貳其事益試爾才可

劉奉世起居郎孔文仲起居舍人

勑欲治國家當先得士頃者人物之評廢而長育之道微朕顧瞻周行惻焉興歎或盤桓久次而未用或沈伏下僚而莫知將以責成治功折衝遐邇人不素具其何

賴焉具官劉奉世家世名臣才穎秀發試以治劇煩而  
益明具官孔文仲進以直言文史足用責之典禮守正  
不回斯皆一時之雋良多士之領袖方欲置之侍從益  
當養其才能左右史官號為要地前後達者皆由此途  
手刊冊書足以明枉直之效密侍殿陛足以觀進退之  
詳益勉自修以須不次可

胡宗炎將作少監

勅具官某官室都城責在工正朕方以恭儉自居以法

度自律宜得慎靜之吏以督繕治之功爾昔居此官號  
為任職往貳其事無改厥勤可

向宗良知衛州

勅具官某士生於富貴者常患其懷安佚樂怠於功名  
爾以外戚之懿求試治民永惟此心有足嘉歎衛雖跨  
河地實近輔勉修爾政朕將觀焉可

郝觀

皇太后殿管勾文  
字生辰除借職

勅具官某朕恭養隆祐朝夕無違爾久此服勞適當誕

慶錫爾一命無改厥勤可

曾肇中書舍人

勅朝廷以號令鼓舞四方言之不文行之不遠昔河西諸將讀璽書而知天子之聖明河北叛臣聞赦令而致武夫之涕泣故朕思得良士俾代予言知民物之至情識邦家之大體擇之久矣僅乃得之具官曾肇少知為文久益更事家傳父兄之學言有漢唐之風汗簡編年手紬金匱執筆紀事密侍丹墀比於簡牘之餘試以絲

綸之作油然不竭煥乎可觀俾即拜於西垣將益觀其  
來效雖文稱蘇李未足以為賢而事問高崔庶幾於適  
用勉於自竭以稱異恩可

邢恕知汝州

勅具官某老吾老以及人之老此朕所以教天下之孝  
也爾比自漢東恩移汝海國有常典中止不行朕終念  
篤老之親宜得便安之養特申前命以慰慈心服我異  
恩益思報稱可

李周陝西運使

勅具官某關中之民勞於征伐而弊於饑餉久矣朕既  
為之含垢以和諸戎天維顯思助我豐歲粒米狼戾法  
當斂藏繼出中都之泉以廣窮邊之積猶恐吏不時具  
而民或未寧分吾此憂責在漕吏爾忠厚之性見紀於  
時治辨之才屢試以事往推朕旨去姦賊之害而督備  
禦之宜使疆場永安而民以無事可

劉淑蘇州胡宗哲宿州

勅具官某等姑蘇之饒冠於吳越符離之災接於徐毫  
因其富庶而待之以法郡乃可治乘其饑饉而濟之以  
惠民亦肯懷苟得其人所至而定以爾淑治郡有方吏  
民不擾以爾宗哲臨事必辦才力有餘往因其民以立  
其政富而不溢貧而無怨以稱朕意可

許彥先知隨州

勅具官某隨於春秋雖號小國然觀其應接鄰敵常有  
賢者今以吾士大夫之多而固無善人以為之守乎爾

蚤有文譽晚習吏治尚無菲薄其民往求所以安之可

孫謌太學博士

勅具官某士濁於專門之學而不治諸書不達前世施  
之於事罔焉不知朕甚患之爾博於文史不流不固往  
司講解思所以救其失者可

王佺通判荆南

勅具官某南郡控引江湖商賈之淵而盜賊之會也守  
貳之事於南方為劇爾游宦之久才力有聞往贊其治

益勉毋怠可

韓玠通判河南

勅具官某爾家世公卿當識治體而西南之政俾民驚擾達於朕聽往貳西都服我恩命無怠循省可

占城國進奉判官蒲霞辛可保順郎將

勅具官某航海而至奉琛在廷心知禮義之榮身無遐邇之異特頒恩命昭示遠人可

劉攽中書舍人

勅士有博學而不文甚文而不達於政者矣朕惟人才之難拔士之急凡所擢用惟其所長矧夫名在文學之科才兼政事之選釋而不用夫又何求具官某能讀墳典丘索之書習知漢魏晉唐之故中東直諒發為謀猷方其流落之中益聞愷悌之政比召還於冊府將漸置於近班適以病辭勉從所請汲黯雖安於卧治蕭生雅意於本朝眷予侍從之華實司號令之本惟詳練可以彌縫庶政惟辯博可以鼓舞四方爾其勉盡所長朕將

觀爾於是可

曹誦遙團知保州

勅具官某惟爾先臣克平吳蜀仁澤之深與江漢無極  
于今四世子孫盛大時出能者昔漢唐功臣高密汾陽  
之家傳世赫奕不殞其業予甚嘉之今爾奮於閭閻之  
中休有措紳之望練達兵事翼贊西樞屬邊守之須才  
加使名以為重予欲不違和好之舊而得嚴整之稱體  
國承家有望於爾可

王獻可火山軍李昭叙石州

勅具官某等河東邊城俗儉而兵勁吏能守法易以為治爾等才稱武吏之選家本名將之裔往修厥政以寬治民以嚴御兵思稱朕意可依前件

鄒極江西提刑何琬府界提刑

勅具官某等朕惟古之聖王不泄邇不忘遠雖在江湖萬里之外眎之如畿甸之間是以並擇才能以察犴獄以爾極出將使指入參郎曹以爾琬比在江淮積有歲

月咸能慎所施設紀於吏民夫寃民滯訟苟為不察雖  
堂上有不能矚苟為察之雖遠何患往祇爾事克慎庶  
獄以稱朕意可依前件

葉溫叟度支郎中

勅具官某朕既克己裕民凡非法之求罔不罷去而國  
之經用率如故初是以恩得敏強之臣理財節用以美  
補不足爾以儒雅吏術有聞於時其能量入為出助成  
地官以濟我邦計可

吳革江西運判

勅具官某江西地薄民貧儉而好訟頃者有司失計以鹽賦民愁嘆無聊因弊愈甚朕雖已弛其峻密復其故常而瘡痍未平念之未嘗忘也爾以才敏擢守廬陵知其吏民之艱究其本末之變往佐漕事思所以安而養之以稱朕意可

杜常兵部郎中

勅具官某夏官掌天下兵事而邊防禁旅馬牧之政比

皆隸於西樞則事益鮮矣爾以吏能久於其屬於法當遷夫以久習之吏而治益鮮之事宜其無不辦也往率乃職益勉無怠可

榮咨道通判鎮戎軍

勅具官某被邊之地政兼兵民武吏以奮其威文吏以治其政凡所以愛民備敵之道至矣爾頃以博學多聞試於奉常出佐疆場勉勤職事益以觀爾可

錢式三班借職

勅具官某國家廣漕東南以實中都爾董其事免於亡失錫以一命益勉無怠可

翰林醫官陳易簡等六人比舊各減三官牽復  
勅具官某等醫如函人皆志於仁不幸失之法不可廢而情則可恕爾等奪官既久稍復其舊體予至恩益勉毋怠可

李括知洋州

勅具官某益昌諸郡莫如梁洋池通蜀漢之饒俗兼秦

隴之勁每欲擇守常難其人爾頃為赤令勤勞茲久懷  
組過家無異鄉國服我恩寵勉思治民可

張士澄通判定州

勅具官某君子之仕不以高下易其心爾昔以才敏嘗  
奉使指茲予命爾佐中山守往悉乃力益勉於事則予  
汝嘉可

彭次雲吏部郎中

勅具官某以資格用人所以為公也而賢不肖雜採無

以獎勸士大夫朕既命有司講求其方矣爾為地官屬以才能稱進領銓事其悉心流品思稱朕意可

章棠吏部馬琬戶部韓宗右司封吳安憲都官黃景職方部官

勅具官某等先帝以禮樂刑政貴成於文昌用人之難非它官比清曹劇部尤重其選惟能試之有漸是以用無不宜以爾棠按察西南治辦不撓琬典領徒隸從容有餘宗右出入臺閣有靖慎之風安憲家世公卿有練

習之譽景質性端茂學術有聞並稱一時之良為我庶政之助譬如衆輻各致其用然後大車得以運行勉悉爾心以稱朕命可依前件

盛僑國子司業

勅具官某先帝肇新辟雍以養多士於茲歷年學者雲集師儒之任比益重焉是以增命樂正之官以輔司成之教爾以老成端厚久於郎曹往祇厥職勉於訓厲無使陽城韓愈之流專美於前世可

黃庭堅著作佐郎

勅具官某左右史記言動之詳而宰臣紀時政之要以授東觀會而成書然後善惡之實後世得以考焉苟非其人何以取信爾孝弟之美著於閨門文史之功稱於朋友昔張衡崔駰張華束晳皆以才行久於此官朕既思見古人爾尚追配前烈可

陳侗直祕閣知梓州

勅具官某朕憂勞遠人過於畿甸以為吏之侵漁細民

者遠則莫見民之呻吟疾苦者遠則莫聞是以選任守  
臣惟艱惟慎爾以臺閣之舊出臨關陝曾未期歲厥聲  
茂焉朕惟東蜀郡縣之多思得循吏鎮撫其俗進直書  
閣寵光西南尚無菲薄其民勉修安靖之政可

晏知止成都運副秦中梓州運副

勅具官某等蜀嶮而遠民弱而畏吏吏失其道民始無  
告久而不堪或以生事故朕選任使者必先循良將使  
吏不為暴而民不失職以爾知止賢相之後文雅有餘

以爾中治術之精前後可紀託以二蜀之重分吾千里之憂爾其急吏緩民深體朕意可

游酢太學錄

勅具官某凡有職於成均者皆士之秀也爾以學業之茂獲與茲選勉修其行使士大夫有觀焉可

張舜民監察御史

勅具官某御史之官知無不言則朝廷肅時然後言則天下信嘉謨嘉猷朕之所急也用人之慎孰先於此爾

以文行風節見紀於時方名寘石渠而臺以名聞往祇  
厥服使言必有物行必有常以稱朕命可

張績祕書省正字

勑具官某用之則行舍之則藏此孔顏之行而士之所  
師法也爾昔以直言進流落不用十有餘年安於潛默、  
不慍不求今予命爾於東觀將用之也其勉修所以行  
之者以稱朕意可

李執柔司農寺丞

勅具官某大農事歸於地官則永事益簡然鄉寺之屬皆吾養材之地也爾家世名臣業履修飾往祗厥官無墮先烈可

陳烈落致仕福州教授

勅具官某惟孝友於兄弟是亦為政爾以篤行見紀於東南雖老而不試可以無憾朕方欲推爾所為施於鄉人其起視學校使諸生有所矜式可

龍原國子監丞

勅具官某爾昔以經術教國子矣中以罪廢而士大夫  
高爾之義有司薄爾之過其往蒞亟事使天下知朝廷  
用人之周無善不舉可

仲葩遙刺

勅具官某古者宿衛之臣勤勞于內刺舉之吏捍守于  
外蓋官稱其事祿視其功事功既修然後得之今朝廷  
以仁治親爵秩之施舉從其厚故爾以積年為勞考課  
當遷然非其孝弟恭儉持身有法則亦何以及此其服

我恩命勉於自修使寵祿日至而無盈滿之患以稱朕意可

吳淵西頭供奉官俞謌左侍禁

勅具官某等爾以史事宰府久勤於職懇求補外惟廉且慎可以終荷寵祿可依前件

來說知博州

勅具官某吏部以格用人嚴鉉綜之叙雖有賢者不得獨進故使政事之臣視其才能資任而以時用之然後

法不亂而才不滯爾以吏能見紀歷典劇郡河朔之民  
方以饑饉為憂往勤勞來以弭流亡之患可

閩木太學博士葉濤正

勅具官某等天下之士視成均之所趨向以為風俗朕  
方患其學術之襍駁而文體之流蕩使得知本務實之  
士相與正之木才質端厚學有原本濤議論堅正行極  
純潔其往師多士喻以朕意可依前件

宋寶

深澤主薄威之父  
一百歲餘承務郎

勅某祖宗以來以仁率天下肆予士民皆得保其天年爾以行義之厚獨享期頤之福一鄉所重朝所尊禮歲時有束帛之寵廵守有就見之義宜加一命以成子孫祿養之美可

韓忠彥樞密直學士知定州

勅有唐開元之初以儒將守邊靜則詳於治民動則計而後戰邊鄙不竦號稱得人茲予祖宗阜康兆民和諧戎狄垂白之老不見兵革亦惟禮樂之士能收干城之

功用人之明豈獨前世具官某元臣之後風力自將拔  
於周行旋付河間之重入參法從遂膺宗伯之選世有  
明德人無間言惟乃顯考嘗以旄節為中山守寬厚之  
化浹於斯民嚴整之聲震於鄰國三十餘年故吏遺民  
猶有存者今予命以要職撫寧斯土爾亦益懋乃德視  
乃先烈使北邊之人知韓氏有子予亦有臣豈不休哉  
可依前件

劉敏知辰州

勅具官某武陵被邊舊難其守比斥廣沅溪而控扼諸  
夷實賴茲土爾才堪繁劇累更任事尚能持身潔廉與  
物安靜以循養斯民懷服異類可

龐希道復翰林醫學

勅具官某爾以醫從仕始以不驗失官終以有勞獲叙  
功過相除固法之所許也既復爾舊益懋乃術以答恩  
寵可

克勅仲登並磨勘改正任防禦使

勅唐始以防團領四方之戎事中以刺史持節兼治兵  
民國朝參其舊章因其爵秩以錄親報功恩禮尤重以  
爾具官克効力行孝弟著於閨門具官仲譽服勤詩禮  
信於朋友皆董司環衛兼領遙州積勞之久歲月應格  
俾正使名之重益隆磐石之宗夫富而能約者可以保  
家貴而知降者可以安職服是恩命思予訓言可

蔡確改知安州

勅朕體貌大臣務全終始有善則藩飾褒顯以風勵天

下有過則遷就諱避以曲全舊恩至於用法蓋不得已  
其官某卓以才力奮於下僚旋蒙器使致位元宰弟碩  
不類貪冒有素而溺於私愛以廢公議曲從舉吏之請  
遂成黷貨之辜其驕奢淫縱之狀理無不知而涵養蒙  
蔽之甚殆非體國致頗言之並作雖欲宥而不能默守  
小邦仍褫舊職往自修省尚體至恩可

呂公孺知秦州

勑秦故重鎮統制西戎乃者肇復河湟邊候浸遠雖復

號稱近地而實據其本根用人之難與昔無異具官某  
故相之後風流未亡舊德之重出入見紀臨民有寬厚  
之美治兵知節制之方偃然長城可託西顧朕方包裹  
甲兵以懷柔異類督厲將帥以完整邊防蓋非靖重無  
以為安非繕治無以持久祇率朕意勉成厥功可依前  
件

欒城集卷二十八

欽定四庫全書薈要卷一萬五千二十四

集部

樂城集卷二十九

宋 蘇轍 撰

西掖告詞六十一首

仲鸞等六人磨勘防禦使

勅朕於族屬之尊思極富貴之奉至其進秩之際必由  
考績之詳蓋所以示出爵之非私勉修身於在位典章  
之舊朕何敢忘具官仲鸞力行孝恭閨門稱順具官仲  
隗服勤詩禮朋友攸嘉具官仲癸恭儉自將有縉紳之

度具官仲卿修飾匪懈號宗黨之良具官仲聘信厚之深居有聞望具官仲霜威儀之謹勤無過尤皆領職遙州分董右衛既積勞於累歲宜正命於前官尚能以約保家以謙守位服此新命思我訓言可依前件

張之諫知德順軍

勅具官某守土之臣皆欲久於其事矧夫邊吏內撫軍旅之政外禦夷狄之情非習其故何以能稱爾以才勇謀畧出入邊鄙安定之治綽有令聞是用就易符竹往

施舊政蓋所以安靜疆場非獨便爾私也可

冠誦覃恩改朝請大夫

勑具官某朕纘嗣不業思與士大夫祗奉遺訓同濟於艱難爾久服官政有勞於位登進爵秩非予爾私亦惟先聖之德澤不泯於下可

郭時亮通判海州

勑具官某朝廷之法無言不酬無德不報爾昔在定武首發奸謀而義不受賞歲月久矣大臣猶以為言東海

名郡往貳守事益勉於政將以觀爾可

安宗說知利州

勑具官某益昌之民山居而谷飲控二蜀之要耕桑不足而商賈有餘不得安靖之吏民將有不堪命者爾皆以選用所至有聞不由吏部復典茲郡其益勉於從政以報恩命可

范子竒河北轉運使

勑具官某河決而西汗漫千里聽其西流則堤防未立

郡縣受害塘水堙塞導之東徙則功費極大民殫於役  
水未必聽頃者議論紛紜未知適從人民流散靡所戾  
止朕中食嘆息思救其患以爾任寄之久才力有餘頃  
將北漕嘗講茲事是用申錫前命責之成功夫使水不  
潤下民不宅土則徵賦靡弊帑廩耗竭漕事盡廢爾將  
何以尸此其往悉乃心博謀於衆詳究利害以時上聞  
朕將考而施之尚勉無忽可

吳安持司農少卿崔公度將作少監

勅具官某等朕用人之廣實惟其材上自公卿之家下  
迨山澤之雋一有可任不論其世以爾安持賢相之子  
所見者大歷試頗劇風力有餘以爾公度奮自東南文  
采自表用之諸寺職業不廢遞加進擢以慰勤勞或勉  
興九農之功或益修大匠之政朕將考察其實以觀成  
功可

王兢湖南提刑

勅具官某朕俾士大夫入治省曹出按州郡非特以寵

祿厚其身也內則習知朝廷政事之體外則審察吏民  
情偽之變踐歷既久獎用亦重爾總督倉庾才力有聞  
惟湖湘之遐民習險陋之故犴獄所寄得人則安其尚  
悉乃心罔以內外之殊而不盡其力可

錢煦知真州

勅具官某五代藩鎮之家惟吳越之後冠冕相屬豈惟  
朝廷寵綏之厚亦其子孫忠孝之篤揚子重地據江浙  
之會守土之吏未嘗不選也爾以奉使之勤還領其事

治民之餘得以瞻望祖父之故國豈不休哉可

王漸知階州郭逢知德順軍

勅具官某等朕以恩信御夷狄以嚴整治邊鄙當使我一直彼曲彼亂我治庶幾兵民底於安靖凡守邊之吏皆當知朕此意爾等咸以才謀見紀習於疆事往祗厥官肅戒無怠可

蕭士元石州李昭叙忻州李訢隰州

勅具官某等河東諸郡犬牙相錯皆密邇隣國有兵有

民凡與茲選其任惟一爾等咸以謀略才勇所臨治辦  
或告親嫌許以易地將使吏卒無送迎之苦而邊鄙獲  
安靖之便各勉於事以稱朕意可

致仕馬充等以登極恩改承奉郎

勅具官某等爾以耆年知止退安丘樊顧予纊服均需  
多士進秩之寵隱顯同之往服異恩以介眉壽可

燕若濟知東明縣

勅具官某古者大邑必使學者制之矧惟畿甸四方觀

法於此大臣以爾才堪治劇命以東昏耳目所接得失  
可考可無勉哉可

陳向知楚州

勅具官某爾為部使者薦士失當以致人言朕不忍廢  
付爾山陽淮南之民薦經水旱流亡未復勉修政事勞  
徠安集俾民宜爾以蓋前咎可

士鱣磨勘轉右監門衛大將軍

勅具官某凡予五宗之屬皆有十年之叙勤勞非在廷

之比而爵祿居庶姓之右所以示親親也爾能孝恭內外無怨無惡坐閱歲月以陟門衛苟知以進秩為懼日務克已則寵祿之至何止於是可

黃好謙知濮州

勑具官某爾齒髮雖衰而風力猶在憚於朝謁亟請外官朕惟民政之難不惟其力而惟其才俾朕得循良以牧養細民俾爾得暇豫以攻治衰疾夫亦何所不可濮陽之治尚能勉以圖報可

張脩駕部郎中

勅具官某馬牧之政歸於西樞則司駕之治簡矣以爾才力之優歷使諸部亦既勞止還總車乘之政試於內服益以觀爾可

王瑜京西提刑

勅具官某官宿其業則民安其政方今吏溢於額朕雖欲行之而有所未暇以爾按刑於淮甸歷年之久民無怨言茲復命爾督視許鄧地雖不同而職事如一庶幾

練習之故以無曠弛之慮祇朕新命益勉無怠可

康識權發遣鄜州今落權發遣

勑具官某朝廷急於用人故士有以資未應格進攝事  
者爾以才智足用擢守鄜時歲月既久治辦有聞俾正  
厥官益思所報可

楊叔儀少府少監守本官致仕

勑具官某陳力就列不能者止古之仕者以之而士大  
夫有不能者爾起於布衣進貳列卿而能因病告休敦

止足之義因其舊秩歸耀鄉黨尚使子弟知所矜式可

融州歸明楊成該等改右班殿直

勅具官某等爾等獻地築堡披山通道忠孝之心見于勤瘁不有褒顯孰云旌勸特命進直列於廷臣祗服異恩永保疆場可

曾肇磨勘改朝散郎

勅士大夫有常秩者皆得以叙進至於近侍之列優以三歲之典非謂從官親近而特私之也進用賢才理有

當爾具官某學術精博遣詞甚工操履堅正遇事不苟  
比司國史煥乎筆削之華進領掖垣確然議論之正有  
司考績於法當遷稍陟崇階增重要職勉服寵光之厚  
益思報稱之宜可

蕃官折師武覃恩改西頭供奉官

勅具官某朕纘承不構推恩四海罔有內外咸進爵秩  
爾世在疆場有守禦之勤服吾異恩勉事忠孝可

郭知章知海州江公著通判陳州

勅某等天下之士非舉無以知其賢非試無以効其實舉之於衆而試之以事此先王所以求賢責實之方後世之所不易也爾等咸以才名薦於近臣朕信而任之使知章守東海使公著佐淮陽勉悉乃心朕將觀爾所為以知言者之非妄可

黃好謙知潁州

勅具官某汝陰民庶而事煩河通而地勝前後擇守皆用名流圖牒具存風迹未泯爾才術通敏長於治人出

入勤勞久於郎省自求外服以養高年亦何愛於一邦  
不以成其素志益勉於治以答異恩可

霍唐臣知濠州

勅具官某士奮於布衣為列郡守有民有社可以言政  
爾積累勤瘁逮茲長人濠雖小邦而民物之繁山川之  
勝苟治之有道亦足以觀循良之効矣可

晁端彥吏部郎何洵直司勲郎顏復禮部郎

勅具官某等朕慎於用人進必以漸考實已試之効常

懼或失其人故使端彥以功籍之明升領右選洵直以  
典禮之修進秩勲府復以奉常之勤擢佐奉官庶幾習  
焉鮮有敗事爾等其明識朕旨省察奸吏剖決留事以  
稱吾設官之意可

辛癱太常博士韓宗文光祿丞孔平仲太僕丞

勅具官某等朕網羅俊人而分之職事以養其才能苟  
無曠官有進無退癱儒雅自飾藹然有聞宗文世族之  
良勤於厥事平仲詞學有本敏於為政皆由已試之効

當吾次遷之選夫奉常三禮所在而膳羞閑牧朝夕之所有事也其勉悉乃心務舉其職以稱朕意可

元耆寧館閣校勘換校書郎

勅具官某先帝始復圖書之府並建官屬而收校讎之職爾昔以大臣子篤志學問列於石渠終喪而來官匪其故祇服新命勉思舊學以克嗣世可

梁熹轉朝奉大夫

勅因材任人國之大柄考績進秩吏之常法乃者歷選

滯淹試於侍從而有司奏課以時上聞非朕敢私法固當爾具官某早以好學名寘石渠中以嘉猷入事樞府恬於榮利久此盤桓方議禮於秩宗旋納忠於西掖進對一再議論雍容歲月之遷未足為寵大言大利將有疾焉可

張淳知長垣縣

勑具官某士欲得民而行志莫如為邑毀譽易聞榮辱易及莫如畿甸大臣言汝可辦是邑往慎所為毋忝知

者可

李清臣資政殿學士知河陽

勑朕惟先朝政事之臣與聞玉凡之言常奉橋山之禮  
助我致治行將三年出納萬微日以詳練而乃飛章自  
乞誠意確然屢却不回執志莫奪止足之懼黽勉而從  
具官某博學洽聞蚤與直言之對高文密議中陪禁苑  
之遊自登承轄之司益著忠勤之効勸於機事力請近  
藩雖大臣體國不以中外為心而朝廷任人常敦始終

之分三城重地少假賢勞秘殿隆名益旌舊德尚懷眷  
予之厚入告謀猷之嘉惠安小民推廣予意可

張整皇城使廣西鉞轄加遙刺再任

以交人理會  
地界之故

勅具官某桂林諸郡帶山並海控引裔夷比雖少安而  
備禦之宜常若寇至爾以才勇謀幹久於其地特加遙  
州之貴仍領兵鉞之重勉圖方略以答恩寵可

醫官元瑞叙榷易使

勅具官某爾以方技事上前以不效失官後以有勞進

秩時既當叙而法非其故疑而從予古之道也祗服異恩益勉無怠可

交趾使黎鍾吏外副杜英輩東頭供奉官

勅具官某等梯航之勞不憚嶼遠職貢之禮克遵故常特加朝命之榮以為海邦之耀往服恩寵無廢忠勤可

鄧忠臣秘書正字

勅具官某爾昔以賦頌之工登圖書之府終喪來見舊學未忘往祇厥官以卒前業可

成卓

西京左藏庫副使。邕州左右江都巡檢差人。畫歸化州地圖致懷智會乞割峒地與之。陞

降兩官監

筠州酒稅

勅具官某歸化近藩與吾疆土相接爾為邊吏而致其割地以附益遠夷不任其咎罪將誰執奪爵二等邦有常憲往祇厥官深體寬宥可

仲彥轉正任防禦使

勅朝廷篤於九族之恩許以十載之叙使其賢者有所勸勉而怠者知自修飾祖宗之舊漢唐所無有司奉行

敢有加損具官某幼知義訓長事禮文無膏梁之譏有  
搢紳之譽久服勞於遠郡茲正命於使職其克自修以  
永終譽可

曹評正任防禦使

勅曹氏為將不妄誅戮遠人安之忠厚之報集於子孫  
自勝衣以上皆高爵重祿而天下以為過朕甚嘉之  
具官某幼蒙父祖之慶長有搢紳之譽服事左右勤勞  
匪懈正名閑禦之任以旌恪恭之懿服我休命毋忝乃

祖可

熊本降授朝散大夫

勑守器不假疆場之常道啓寵納侮蠻夷之野心謀之  
不臧終必貽患具官某昔以近侍出守桂林眷歸化之  
近藩有裔夷之小警不惟分土之素定輒興畫界之狂  
謀舉八縣之故封指三隘而為境苟幸一時之無事遂  
忘經世之遠圖咎既莫追罪不可赦奪官一等國有常  
刑思蓋往愆爾其自訟可

張綬湖南提刑

勅具官某爾等以常平奉使官廢而罷濟南大藩民富而多盜布政期月人亦用乂荆湖之南地遠而多嶮民悍而喜訟犴獄之寄惻於予衷往祗厥官布欽慎之意蓋朕之用人惟善所在不以遠近為異爾其勉之可

劉當時太僕簿

勅具官某朕數求雋良選世族之後惟乃顯考昔為嘉祐侍從之冠文學議論有絕倫之聲肆爾仲叔侃然自

以不忘前人茲予命爾僕臣之佐以修閑牧之闢母荒失朕命以忝乃父可

張崇古尚書省都事出職改朝奉大夫

勑某仕為大夫出守列郡士之力學行義有白首而不能至者矣爾名在中臺勤勞積歲坐而致此朝廷之於三省厚矣蓋將自是為吏民長惟清與慎乃能終荷斯

寵可

陳遊古知沂州

勅具官某沂居齊魯之間周孔之風既遠民悍而喜寇法之所以待之者不與他郡等朕甚憐之以爾老於從政知吏民之情往求所以安之非徒勝之而已也可

周純知虢州朱陽縣

勅某縣令雖輕職要而近民苟得其人事或以濟虞詡為朝歌長施設方畧使積歲之盜一朝而去今吾士大夫之富不愧於古而獨無其人乎聞爾昔討廖恩折馘執俘幾獲渠帥而以誣罔被譴功不時賞今商號之寇

依阻為虐往思古人時建功名以効疇昔之勇可

宋子儀大理寺丞

勅某用人之明莫如已試崇陽之訟誣執交構更數獄  
吏皆不能察汝能究其本根而枝葉自舉使冤者獲信  
死者無憾往丞廷尉推行此心要使庶獄皆如此而後  
可可

秦晉國安仁保祐夫人張氏

特封吳楚國安  
仁賢壽夫人

勅朕永懷先帝簪履之遺率皆當今宮掖之貴而况擁

佑聖德夙夜有勞光寵極於一時始終歷於多載不有  
異數何以示恩具位張氏資性淑均值遇明聖躬執燥  
濕之役行薦保傳之賢賜致治於承平誠有功於當世  
封吳與楚實居四海之上游既壽且賢殆兼五福之美  
報號名之盛前後莫倫明發有懷匪以為賜可

彭汝礪右史

勅朝廷以科舉取人甲乙皆侍從之選然而速進有浮  
淺之累歷試得重慎之宜逮茲稍淹士知自養望實既

備用之不疑具官某早以詞章策名第一試之彈奏臨事不回屢嬰權倖之鋒不為進退之慮翹翔外服黽勉歷年今朕思得忠良之士以紀言動之實顧瞻在列咸曰汝宜出入禁闈益將察汝所為長育人才亦當識予深意可

王陟臣右司郎中

勅具官某尚書萬幾所在二丞總之至於條目之煩郎任其責朕既欲得清流以厭服多士又欲得能吏以肅

齊庶政爾名臣之後學世其家昔以藝文膺上第之選  
頃以強齊為天官之屬都司之任汝實宜之往祇厥官  
思稱朕命可

王占吏部員外郎

勅具官某晉魏之間吏部進退天下士而世不以為嫌  
今茲以格用人事輒有法苟能清心奉公宜無不治以  
爾名相之後奉使諸道號稱良能勉佐天官繩留難之  
吏寬滯積之士以求稱吾意可

張詢浙憲

勅具官某地官掌財賦之出納而辨其登耗爾佐其事  
累年於茲亦已勞矣吳越之人文巧好利犴獄多有汝  
長於其鄉而知其情偽往將典憲鉏其豪強而紓其無  
告以致予欽卹之意可

陝西移四通判

永興汲光移秦州秦州鞠承之移  
永興延州崔全移渭州渭州歐陽

成移  
延州

勅具官某等朝廷推誠心以待天下之士而祖宗法令

之舊有不敢逾茲緣親嫌俾爾易地蓋秦雍延渭均號  
藩州而兵民政刑皆足為治勉出爾力以左右元帥母  
以東西易其意可

蔡潛除司農簿

抗子

勅某朕惟英邸舊臣淪謝無幾幸而有子亦既能仕其  
於成就長養宜在朝廷是以擢於稠人命以農屬其尚  
體予至意克祗厥官以母墜其世可

令諫

該覃恩特服終喪  
除右千牛衛將軍

勅某朕嗣服之初博推霈澤爾與陳壤奠退遭閔凶終喪而朝前命不改宜陟環衛之列以均宗黨之榮可

張元方權發遣府界提點

勅具官等畿甸之廣官吏之衆不能當諸道亦明矣然朝廷置使以糾督其政刑則與諸道比蓋所以詳治都鄙而儀刑四方不可不慎也以爾才力之裕習於從政往祗厥官務求實效千里之近耳目所及吾得以觀爾

可

周邠通判壽春

勅具官某鄭復為郡興廢補敗爾與有勤焉壽春之富  
民庶而事叢既以旌爾亦以觀從政之效可

魏璋

先從韓存寶失官後從劉昌作有勞叙奉議郎熙河機宜

勅具官某爾昔從軍瀘戎以譴奪爵起事西帥以功見  
賞逮茲獲叙并舉前勞往佐戎旃勉以圖報惟爾前事  
可以為懲而後事可以為勸懲勸不忘庶幾可以求成  
功矣可

常安民太常博士

勅具官某禮之正國猶繩墨之於曲直其以止患猶隄  
防之於江河雖先王之典布在方冊然神而明之存乎  
其人以爾學術之通長於議論政事之美載於東南尚  
能推明舊章以佐卿貳母使繩墨不得其施而隄防敗  
於微隙勉思職事朕將觀焉可

豐稷工部員外郎

勅具官某周官司空之職曰居四民時地利蓋官室械

器之事不及焉朕方以共儉自居凡興建百役有所未  
暇而大河西流水性未得冬官之責莫斯為重爾性質  
方厚居官可紀往佐爾長職思其憂以稱朕意可

沈季長少府少監

勑具官某天惟無私故物無不生朕於用人惟其可者  
從而舉之爾昔以事廢於朝周旋於外久矣朕棄其過  
而收其所長擢為九卿貳爾亦深識朕意勉修厥職以  
答休命可

林英大理少卿

勑具官某好生之德治於民心然後民知不犯有司今  
朕既省事以安衆棄利以厚民而決獄之煩動以千數  
豈其聽讞之吏不能推行朕意以至於是哉爾以儒者  
通於吏道尚能以經術緣飾法律先民有言與其殺不  
辜寧失不經朕夙夜庶幾天下之更能服斯訓以助予  
治矧於廷尉安可不勉可

欒城集卷二十九



總校官庶吉士臣張能照

校對官中書臣張 壞

謄錄貢生臣黃永澄